

边裔典

邊裔典第五十二卷

姑墨部彙考

版墨

跋祿迦

漢

武帝 年始通西域姑墨國 按漢書武帝本紀不載 按西域傳姑墨國王治南城去長安

八千一百五十里戶三千五百口二萬四千五百勝兵四千五百人姑墨侯輔國侯都尉左右將左右騎君各一人譯長二人東至都護治所二千二十一里南至闐馬行十五日北與烏孫接出銅鐵雌黃東通龜茲六百七十里王莽時姑墨王丞殺溫宿王并其國

後漢

章帝建初三年閏四月西域假司馬班超擊姑墨大破之 按後漢書明帝本紀云云 按班超列傳永平十六年以班超爲假司馬使西域十八年帝崩焉耆以中國大喪攻沒都護陳睦超孤立無援而龜茲姑墨數發兵攻疏勒超守槃橐城與忠爲首尾士吏軍少拒守歲餘肅宗初卽位以陳睦新沒恐超單危不能自立下詔徵超超發還疏勒舉國憂恐其都尉黎弇曰漢使棄我必復爲龜茲

所滅耳誠不忍見漢使去因以刀自剄超還至于寘王侯以下皆號泣曰依漢使如父母誠不可去互抱超馬脚不得行超恐于寘終不聽其東又欲遂本志乃更還疏勒疏勒兩城自超去後復降龜茲而與尉頭連兵超捕斬反者擊破尉頭殺六百餘人疏勒復安建初三年超率疏勒康居于寘拘彌兵一萬人攻姑墨石城破之斬首七百級

三國

姑墨國三國時屬于龜茲 按魏志注西戎傳云云

北魏

姑默國北魏時屬于龜茲 按魏書西域傳姑默國居南城在龜茲西去代一萬五百里役屬龜茲

唐

姑墨國唐時號跋祿迦 按唐書龜茲國傳自龜茲贏六百里踰小沙磧有跋祿迦小國也一曰亟墨卽漢姑墨國橫六百里縱三百里風俗文字與龜茲同言語少異出細氈褐西三百里度石磧至凌山葱嶺北原也水東流春夏山谷積雪西北五百里至素葉水城比國商胡雜居素葉以西數十

城皆立君長役屬突厥 按大唐西域記跋祿迦國舊謂姑墨又曰亟墨東西六百餘里南北三百餘里國大都城周五六里土宜氣序人性風俗文字法則同屈支國言語少異細氍細毼鄰國所重伽藍數十所僧徒千餘人習學小乘教說一切有部國西北行三百餘里度石磧至凌山此則葱嶺北原水多東流矣山谷積雪春夏含凍雖時消泮尋復結冰經途險阻寒風慘烈多暴龍難陵犯行人由此路者不得赭衣持瓠大聲叫微有違犯災禍目覩暴風奮發飛沙雨石遇者喪沒難以全生山行四百餘里至大清池或名熱海又謂鹹海周千餘里東西長南北狹四面負山衆流交湊色帶青黑味兼鹹苦洪濤浩汗驚波汨潏龍魚雜處靈怪間起所以往來行旅禱以祈福水族雖多莫敢漁捕清池西北行五百餘里至素葉水城城周六七里諸國商胡雜居也土宜糜麥蒲萄林樹稀疏氣序風寒人衣氍毹素葉已西數十孤城城皆立長雖不相稟命然皆役屬突厥自素葉水城至羯霜那國地名宰利人亦謂焉文字語言卽隨稱矣字源簡略本三十餘言轉而相生其流浸廣粗有書記豎讀其文遞相傳授師資無替服氍毹衣皮氍裳服褊急齊髮露頂或總剪剃繒綵絡頰形容偉大志性恒怯風俗澆訛多行詭詐大抵貪求父子計利財多爲貴良賤無差雖富巨萬服食粗弊

力田逐利者雜半矣素葉城西行四百餘里至千泉千泉者地方二百餘里南面雪山三垂平陸水土沃潤林樹扶疎暮春之月雜華若綺泉池千所故以名焉突厥可汗每來避暑中有羣鹿多飾鈴鑲馴狎於人不甚驚走可汗愛賞下命羣屬敢加殺害有誅無赦故此羣鹿得終其壽 千泉西行百四五十里至咀邏私城城周八九里諸國商胡雜居也土宜氣序大同素葉南行十餘里有小孤城三百餘戶本中國人也昔爲突厥所掠後遂鳩集同國共保此城於中宅居衣服去就遂同突厥言辭儀範猶存本國從此西南行二百餘里至白水城城周六七里土地所產風氣所宜逾勝咀邏私西南行二百餘里至恭御城城周五六里原隰膏腴樹林蓊鬱從此南行四五十里至斂赤建國 按杜氏通典姑墨漢時通焉王理南城去長安八千一百里戶三千五百東至都護理所千里南至于闐馬行十五日北界接烏孫出銅鐵雌黃東通龜茲六百里王莽時其王承殺溫宿王并其國至後魏時役屬龜茲

月氏部彙考一 月支 赤斤蒙古

漢

武帝 年始遣張騫使於大月氏 按漢書武帝本紀不載 按西域傳大月氏國王治監氏

城去長安萬一千六百里不屬都護戶十萬口四十萬勝兵十萬人東至都護治所四千七百四十里西至安息四十九日行南與屬賓接土地風氣物類所有民俗錢貨與安息同出一封橐駝大月氏本行國也隨畜移徙與匈奴同俗控弦十餘萬故疆輕匈奴本居燉煌祁連間至冒頓單于攻破月氏而老上單于殺月氏以其頭爲飲器月氏乃遠去過大宛西擊大夏而臣之都嬌水北爲王庭其餘小衆不能去者保南山羌號小月氏大夏本無大君長城邑往往置小長民弱畏戰故月氏徙來皆臣畜之共稟漢使者有五翕侯一曰休密翕侯治和墨城去都護二千八百四十一里去陽關七千八百二里二曰雙靡翕侯治雙靡城去都護三千七百四十一里去陽關七千七百八十二里三曰貴霜翕侯治護澡城去都護五千九百四十里去陽關七千九百八十二里四曰胖頓翕侯治薄茅城去都護五千九百六十二里去陽關八千二百二里五曰高附翕侯治高附城去都護六千四十一里去陽關九千二百八十三里凡五翕侯皆屬大月氏 按張騫傳張騫漢中人也建元中爲郎時匈奴降者言匈奴破月氏王以其頭爲飲器月氏遁而怨匈奴無與共擊之漢方欲事滅胡

聞此言欲通使道必更匈奴中迺募能使者騫以郎應募使月氏與堂邑氏奴甘父俱出隴西徑匈奴匈奴得之傳詣單于單于曰月氏在吾北漢何以得往吾欲使越漢肯聽我乎留騫十餘歲予妻有子然騫持漢節不失居匈奴西騫因與其屬亡鄉月氏西走數日至大宛大宛聞漢之饒財欲通不得見騫喜問欲何之騫曰爲漢使月氏而爲匈奴所閉道今亡唯王使人道送我誠得至反漢漢之賂遺王財物不可勝言大宛以爲然遣騫爲發譯道抵康居康居傳致大月氏大月氏王已爲胡所殺立其夫人爲王旣臣大夏而君之地肥饒少寇志安樂又自以遠遼漢殊無報胡之心騫從月氏至大夏竟不能得月氏要領留歲餘還並南山欲從羌中歸復爲匈奴所得留歲餘單于死國內亂騫與胡妻及堂邑父俱亡歸漢拜騫大中大夫堂邑父爲奉使君騫爲人強力寬大信人蠻夷愛之堂邑父胡人善射窮急射禽獸給食初騫行時百餘人去十三歲唯二人得還騫身所至者大宛大月氏大夏康居而傳聞其旁大國五六具爲天子言其地形所有

後漢

章帝章和元年月氏國遣使獻扶拔師子 按後漢書章帝本紀云云 按西域傳大月氏國居藍

氏城西接安息四十九日行東去長史所居六千五百三十七里去洛陽萬六千三百七十里戶十萬口四十萬勝兵十餘萬人初月氏爲匈奴所滅遂遷於大夏分其國爲休密雙靡貴霜盼頓都密凡五部翕侯後百餘歲貴霜翕侯丘就卻攻滅四翕侯自立爲王國號貴霜侵安息取高附地又滅濮達屬賓悉有其國丘就卻年八十餘死子閼膏珍代爲王復滅天竺置將一人監領之月氏自此之後最爲富盛諸國稱之皆曰貴霜王漢本其故號言大月氏云

和帝永元二年夏五月月氏國遣兵攻西域長史班超超擊降之 按後漢書和帝本紀云云 按班超傳肅宗建初八年拜超爲將兵長史假鼓吹幢麾初月氏嘗助漢擊車師有功是歲貢奉珍寶符拔獅子因求漢公主超拒還其使由是怨恨永元二年月氏遣其副王謝將兵七萬攻超超衆少皆大恐超譬軍士曰月氏兵雖多然數千里踰葱嶺來非有運輸何足憂邪但當收穀堅守彼饑窮自降不過數十日決矣謝遂前攻超不下又鈔掠無所得超度其糧將盡必從龜茲求救乃遣兵數百于東界要之謝果遣騎齎金銀珠玉以賂龜茲超伏兵遮擊盡殺之持其使首以示謝謝大驚卽遣使請罪願得生歸超縱遣之月氏由是大震歲奉貢獻

靈帝中平元年冬十一月湟中月氏義從胡北宮伯玉等與先零羌叛 按後漢書靈帝本紀中平元年冬十一月湟中義從胡北宮伯玉與先零羌叛以金城人邊章韓遂爲軍帥攻殺護羌校尉伶徵金城太守陳懿 按西羌傳湟中月氏胡其先大月氏之別也舊在張掖酒泉地月氏王爲匈奴冒頓所殺餘種分散西踰葱嶺其羸弱者南入山阻依諸羌居止遂與共婚姻及驃騎將軍霍去病破匈奴取西河地開湟中于是月氏來降與漢人錯居雖依附縣官而首施兩端其從漢兵戰鬪隨勢強弱被服飲食言語略與羌同亦以父名母姓爲種其大種有七勝兵合九千餘人分在湟中及令居又數百戶在張掖號曰義從胡中平元年與北宮伯玉等反殺護羌校尉伶徵金城太守陳懿遂寇亂隴右焉

三國

蜀賓大夏高附天竺等國三國時并屬大月氏 按魏志注西戎傳云云

魏明帝太和四年冬十二月大月氏王波調遣使奉獻以調爲親魏大月氏王 按魏志明帝本紀云云

北魏

太武帝 年詔月氏國人爲行殿 按魏書太武帝本紀不載 按西域傳大月氏國都盧監氏城在弗敵沙西去代一萬四千五百里北與蠕蠕接數爲所侵遂西徙都薄羅城去弗敵沙二千一百里其王寄多羅勇武遂興師越大山南侵北天竺自乾陀羅以北五國盡役屬之世祖時其國人商販京師自云能鑄石爲五色瑠璃於是採礦山中於京師鑄之旣成光澤乃美於西方來者乃詔爲行殿容百餘人光色映徹觀者見之莫不驚駭以爲神明所作自此中國瑠璃遂賤人不復珍之又大月氏西徙令其子守富樓沙城號小月氏 又按西域傳小月氏國都富樓沙城其王本大月氏王寄多羅子也寄多羅爲匈奴所逐西徙後令其子守此城因號小月氏焉在波路西南去代一萬六千六百里先居西平張掖之間被服頗與羌同其俗以金銀錢爲貨隨畜牧移徙亦類匈奴其城東十里有佛塔周三百五十步高八十丈自佛塔初建計至武定八年八百四十二年所謂百丈佛圖也

明

成祖永樂二年始設赤斤蒙古所以塔力尼爲千戶 按明外史赤斤蒙古傳赤斤蒙古衛出嘉峪關西行二十里曰大草灘又三十里曰黑山兒又七十里曰回回墓墓西四十里曰鬪馬城並設墩臺置瞭卒城西八十里卽赤斤蒙古漢燉煌郡地晉屬晉昌郡唐屬瓜州元屬沙州路洪武十三年都督濮英西討次白城獲蒙古平章忽都帖木兒進至赤斤站獲圖王亦憐真及其部曲千四百人金印一師還復爲蒙古部人所據永樂二年九月有塔力尼者自稱丞相苦朮子率所部男婦五百餘人自哈刺脫之地來歸詔設赤斤蒙古所以塔力尼爲千戶賜誥印綵幣襲衣 按明一統志

赤斤蒙古衛古西戎地戰國時月氏居之秦末漢初屬匈奴武帝時爲酒泉燉煌二郡晉屬晉昌郡西涼置會稽廣夏二郡後魏增置常樂郡後周廢會稽郡隋又廢常樂等郡以其地屬瓜州後屬燉煌郡唐初屬瓜州廣德後沒于吐蕃宋時爲西夏所據元時爲瓜州地屬沙州路本朝永樂二年故韃靼丞相苦朮子塔力尼等率所部男婦五百人來歸詔建赤斤蒙古千戶所以塔力尼爲千戶賜詔印又東至肅州界四百三十里至沙州界一百八十里至京師七千里

永樂八年改赤斤蒙古千戶所爲衛擢塔力尼爲指揮僉事 按明外史赤斤蒙古傳八年回回哈

喇馬牙叛于肅州約塔力尼爲援拒不應而率部下擒賊六人以獻天子聞之喜詔改千戶所爲衛擢塔力尼指揮僉事其部下授官者三人

永樂九年赤斤蒙古衛遣使貢馬 按明外史赤斤蒙古傳云云

永樂十年赤斤蒙古擒叛賊老的罕來獻進秩指揮同知 按明外史赤斤蒙古傳十年以匿叛賊老的罕將討之用侍講楊榮言止兵勿進而賜勅詰責塔力尼卽擒老的罕來獻天子嘉之進秩指揮同知賜資甚厚 按葉向高西域考永樂十年叛寇老的罕走匿赤斤命右庶子楊榮同豐城侯李彬議討之彬榮計道險轉餉難且隆冬興師非司馬法請止兵上從之以勅諭塔力尼遂擒老的罕來獻賜綺幣晉指揮同知

宣宗宣德二年赤斤蒙古且旺失加襲職加都指揮同知 按明外史赤斤蒙古傳塔力尼卒子且旺失加襲修貢如制進秩指揮宣德二年再進都指揮同知其僚屬亦多進秩 按葉向高西域考塔力尼卒子且旺失加嗣晉都指揮同所部韃人祖失加卜等來歸命居平涼

英宗正統元年赤斤所部掠阿端貢物殺使臣詔切責之令還所掠旣與蒙古脫歡等獻捷進秩都

指揮使 按明外史赤斤蒙古傳元年其部下指揮可兒卽掠西域阿端貢物殺使臣二十一人賜勅切責令還所掠尋與蒙古脫歡帖木兒猛哥不花戰勝之使來獻捷進都指揮使

正統五年赤斤以護往來朝使擢都督僉事 按明外史赤斤蒙古傳五年朝使往來哈密者且旺失加具餼糧驛馬護送擢都督僉事

正統六年赤斤部人邀西域貢使敕切責之赤斤蒙古懼瓦剌欲徙居肅州詔諭止之 按明外史赤斤蒙古傳六年天子聞其部下時往沙州寇掠或冒沙州名邀劫西域貢使遣敕切責是時瓦剌兵強數侵掠鄰境且旺失加懼欲徙居肅州天子聞而諭止之令有警馳報邊將 按葉向高西

域考正統五年晉都督僉事明年勅諭且旺失加及都指揮革古者可兒卽等曰近使者至哈密命爾與沙州衛護行爾獨棄朕命不遵革古者又時率其屬往來沙州爲盜暴苦行旅甚負朝廷所以建衛設官封殖爾等之意其改圖毋忽其年赤斤蒙古以瓦剌寇掠乞內遷肅州白城山詔止之已請建寺其地守臣謂寺而不已且予之巢勿許便從之

正統八年瓦剌酋也先欲娶且旺失加女爲子婦娶沙州困卽來女爲弟婦二人請于朝詔各從其

願 按明外史赤斤蒙古傳八年瓦剌酋也先遣使送馬及酒欲娶且旺失加女爲子婦娶沙州困
卽來女爲弟婦二人不欲並奏遵奉朝命不敢擅婚天子以瓦剌方強其禮意不可却諭令各從其
願并以此意諭也先而二人終不欲

正統九年且旺失加年老詔授其子阿速都督僉事代之 按明外史赤斤蒙古傳九年且旺失加
稱老不治事詔授其子阿速都督僉事代之也先復遣使求婚且請親人往受其幣物阿速虞其詐
拒不從而遣人乞徙善地天子諭以土地不可棄令獎率頭目圖自強又以其飢困令邊臣給之粟
所以撫卹者甚至先是苦朮娶西蕃女生塔力尼又娶蒙古女生都指揮鎖合者革古者二人乃分
所部爲三凡西蕃人居左帳屬塔力尼蒙古人居右帳屬鎖合者而自領中帳後苦朮卒諸子來歸
並授官至是阿速勢盛欲兼并右帳屢相仇殺鎖合者不能支懇于邊將欲以所部內屬邊將任禮
遣赴京請發兵收其部落帝慮其部人不願內徙仍遣鎖合者還甘肅而令禮往取其孥 按葉
向高西域考且旺朱加卒子阿速嗣爲都督僉事指揮同知鎖合者乞晉秩且言肅州都指揮胡麟
阻其市易勅戒胡麟而以鎖合者爲都指揮僉事先是且旺失加嘗言瓦剌也先來求婚未卽聽至

是也先遣人要阿速往受聘阿速以聞復請內遷避瓦剌報詔也先求婚朕向許爾父自擇便宜不中阻顧受聘非宜往而見詐悔將何及赤斤爾世守地奈何棄之爾第保險綏衆善自備朕且命邊將緩急爾矣是時瓦剌強赤斤蒙古與沙州罕東名內屬然陰與虜市至受平章等官沙州酋薛令以爲言詔詰責之

正統十三年邊軍護哈密使臣至苦峪赤斤總兒加陸率衆圍城官軍出擊逃去詔責令阿速縛獻犯者 按明外史赤斤蒙古傳十三年邊軍護哈密使臣至苦峪赤斤都指揮總兒加陸等率衆圍其城聲言報怨官軍出擊之獲總兒加陸已而逃去事聞敕責阿速令縛獻犯者

景帝景泰元年以擒叛寇功晉阿速都督同知諸部下陞賞有差後復晉左都督 按葉向高西域考云云

景泰二年也先復遣使求婚于赤斤敕阿速捍禦 按明外史赤斤蒙古傳二年也先復遣使持書求婚會阿速他往其僚屬以其書來上兵部尙書于謙言赤斤諸衛久爲我藩籬也先無故招降結親意在撤我屏蔽宜令邊臣整兵慎防并敕阿速悉力捍禦有警馳報發兵應援從之

景泰五年也先益圖兼并遣使齎印授阿速魯令臣服阿速不從報之邊臣會也先被殺獲已按明外史赤斤蒙古傳云云

英宗天順元年賜阿速綵幣進秩左都督按明外史赤斤蒙古傳元年都指揮馬雲使西域命賜阿速綵幣俾護送往還尋進秩左都督

天順年定赤斤蒙古筵宴及下程之制按明會典赤斤蒙古衛天順間筵宴一次又赤斤蒙古衛天順間使臣四人五日下午程一次鵝一隻雞四隻酒八瓶米八斗麵八斤果子四色蔬菜廚料憲宗成化二年阿速卒子瓦撒塔兒嗣其下數侵盜邊將誘瓦撒塔兒送之京師數其罪遣還按明外史赤斤蒙古傳二年阿速卒子瓦撒塔兒請襲卽以父官授之其部下指揮敢班數侵盜邊境邊將誘致之送京師天子數其罪賜資遣還

成化六年赤斤部人以瓦撒塔兒幼弱乞給其叔父乞巴等都督衛事乃授指揮僉事按明外史赤斤蒙古傳六年其部人以瓦撒塔兒幼弱其叔父乞巴等二人爲部族信服乞命爲都督理衛事瓦撒塔兒亦上書乞予一職協守邊方帝從其請並授指揮僉事

成化七年瓦撒塔兒卒子賞卜塔兒嗣 按明外史赤斤蒙古傳七年瓦撒塔兒卒子賞卜塔兒嗣
爲左都督

成化九年土魯番陷哈密遣使招赤斤都督僉事昆藏同叛昆藏以書來獻詔嘉賚之 按明外史
赤斤蒙古傳九年土魯番陷哈密遣使三人以書招都督僉事昆藏同叛昆藏不從殺其使以其書
來獻天子嘉之遣使賜賚且令發兵攻討昆藏以力不足請發官軍數千爲助朝議委都督李文等
計度已而文等進征昆藏果以兵來會會文等頓軍不進其兵亦還

成化十年賞卜塔兒以千騎入肅州將與阿年族番人讎殺邊臣諭却之事聞勅以後不得擅相侵
伐 按明外史赤斤蒙古傳十年賞卜塔兒以千騎入肅州境將與阿年族番人讎殺邊臣旣諭却
之兵部請遣人責以大義有讎則赴愬邊吏不得擅相侵掠從之

成化十四年赤斤部人以賞卜塔兒幼不更事請以其指揮僉事加定總衛事詔擢加定都指揮僉
事暫掌印務 按明外史赤斤蒙古傳十四年其部人言賞卜塔兒幼不更事指揮僉事加定得衆
心乞遷一秩俾總衛事賞卜塔兒亦署名推讓而罕東酋長復合詞奏舉且云兩衛番人待此以靖